

四庫全書

史部

欽定四庫全書

平定準噶爾方略正編卷七十一

乾隆二十四年夏四月辛亥朔

申諭定邊將軍兆惠等應援和闐各事宜

上諭軍機大臣曰兆惠等數日來未有奏報想瑚爾起等領兵已抵和闐此時和闐若無他故則伯克鄂對及侍衛齊凌扎卜等勞績懋著俱應加恩蓋伊等以綠旗兵數百與回人雜處尚能保守和闐

較兆惠等有滿洲索倫兵數千者為更難令軍營侍衛頗多足敷調遣除伯克鄂對仍令駐劄和闐外齊凌扎卜噶布舒著即來京休息再去歲派出滿洲索倫察哈爾兵原以更替久在軍營者俾得撤回因兆惠等被圍復行發往此次平定葉爾羌後即令各回本處不必再行陳奏候旨仍將朕軫念伊等勞苦之處曉示知之又

諭曰昨兆惠等請將烏里雅蘇台存貯箭枝送往軍

營因哈密巴里坤現在運送已降旨停止但此項
箭枝係在京王大臣所進甚為精好除現送十萬
枝外所餘十萬枝前據黃廷桂奏已分派各營著
傳諭吳達善仍行查出送往哈密以備軍需

命稽察內地臺站

上諭大學士曰現在青草發生正當大兵進剿之時
各處軍臺最關緊要自哈密以外已降旨令五吉
定長等悉心整頓其哈密以內臺站各該督撫等

辦理尚屬無悞著再傳諭令其督率專司軍臺大員往來照看實力稽察務使馬匹臆壯遞送迅速以收實效

癸丑

定邊將軍兆惠等疏奏應援和闐各事宜

兆惠等奏言臣等途次聞和闐被圍已遣瑚爾起等領兵九百往援抵阿克蘇時馬駝不足因應援事急臣富德同舒赫德等挑選綠旗兵一

千二百名每人給馬一匹令其牽馬步行定於
三月初十日起程俟勦滅賊衆後由痕都斯坦
等路堵截逃賊即從彼往取葉爾羌至臣富德
原議派馬兵三千步兵二千今合算瑚爾起之
兵共二千一百餘名其八百餘名留副都統瑪
瑞侍衛老格等管領俟馬駝軍器送到再行進
發臣兆惠催齊馬駝糧餉亦即向葉爾羌進發
又准瑚爾起等報稱二月二十日至和闐之達

里雅河遇侍衛噶布舒遣往阿克蘇之回人等
詢知額里齊哈喇哈什二城尚未失陷餘皆為
賊所據若此時葉爾羌無賊衆前來尚可支持
即儘力速行往援等語臣富德亦即領兵進發
奏入

上諭軍機大臣曰覽兆惠等所奏瑚爾起呈報和闐
情形看來霍集占力已窮蹙兆惠等於正月十四
日解圍而出至二月初二日相距已半月餘和闐

回人尚云葉爾羌未有賊衆前來是從前圍守軍營及侵犯和闐不過烏合之衆一經勦殺逃散更多兆惠等應就現在兵力加意奮勉以冀大功速成再前諭福祿不必在叅贊上行走今著仍其舊任昨又命明瑞為叅贊大臣計伊等兩隊叅贊大臣富德處較少著阿桂在伊隊內行走瑪瑞老格曾諭令來京今來奏似尚未得旨若已隨富德前往和闐仍著領隊行走又

諭曰兆惠等奏稱目安集延前來之布魯特和碩噶爾稟稱從前搶掠喀什噶爾之英噶薩爾城係布魯特呼什齊部落之納喇巴圖等語和碩噶爾何事來至軍營或係貿易到彼或因去歲約其春間至伊犁投見可因便覆奏

諭叅贊大臣舒赫德酌給臺站回人口糧

上諭軍機大臣曰舒赫德奏稱富德應援和闐安設臺站派察哈爾兵二十名綠旗兵五十名辦給馬

駝口糧又回入三十名伊等情願自備口糧未經
另給等語回人新附未便令其自備口糧可傳諭
舒赫德將所派回人照軍糧折給價銀以示體恤
嗣後派出回人即遵照辦理

命賞乾清門侍衛瑚什等整裝銀兩

上諭軍機大臣曰據兆惠等奏稱乾清門侍衛瑚什
額爾登額科普薩蒙古勒侍衛班領永德來軍營
時未給整裝銀兩今派出伊等進勦請借給二年

俸銀咨明坐扣等語瑚什等自京起程既未領過
整裝銀兩著加恩賞給伊等二年俸銀不必坐扣

甲寅

議山西撥解馬匹

山西巡撫塔永寧奏言山西營驛馬匹於上年
七月內挑送二千六百餘匹前赴肅州久經購
補足額今聞陝甘馬匹缺額未補者尚多臣於
各營馬匹內擇其臆分充足者二千一百匹可

否解至安西補缺或送往肅州備用奏入得

旨軍機大臣議奏尋議西安滿營缺額馬匹前經遵
旨令方觀承節次代購二千五百餘匹無須再為抵

補惟甘省軍務未竣自應多備馬匹但由山西
至肅州長途未便解送臣等酌議請將西安滿

營之馬挑選二千一百匹解赴肅州備用其山

西馬匹即解赴西安補缺所有西安解肅馬匹

或留肅飼秣或交巴里坤大臣牧放聽候調撥

應令吳達善酌量情形奏明辦理奏入

上從之

丙辰

諭辦理屯田副都統定長派送糧運駝隻

上諭軍機大臣曰吳達善奏稱辦送軍營駝隻七千

尚餘駝一千二百隻現在糧運緊要行文五吉令

其擇出一千隻送至闡展備用等語適因富德等

將糧運駝隻帶往和闡購補缺額不易議將哈密

關展庫車等處現有駝騾輕為馱載送至阿克蘇原屬通融辦理今哈密既送馱一千隻即當送往阿克蘇以應急需著傳諭定長不必拘泥前議止圖節省駝隻以致糧運稽遲總之辦理軍需惟在相機行止方有實濟此項駝隻可即行解送

丁巳

命閩浙總督楊應琚調補陝甘總督

上諭大學士曰前有旨諭閩浙總督楊應琚來京原

以將來陝甘事務非一總督所能經理今明德現
在丁憂一時乏人吳達善著以總督管理甘肅巡
撫事務陝甘總督員缺著楊應琚調補楊應琚未
到任之前吳達善仍兼管總督事務

已未

哈密辦事內閣學士五吉疏奏合計軍營糧餉
五吉奏言派出軍營新舊兵丁共二萬二千餘
名尚有一半未至阿克蘇先經舒赫德等酌計

口糧行取採買羊隻查軍糧自上年八月起由哈密運至闕展共四萬石現在陸續轉運又甘肅購辦羊五萬餘隻合之巴爾品等所購計十一萬餘隻縱路遠倒斃亦可供二萬兵丁三個月之食其闕展轉運糧石可支至本年九月接濟無悞奏入報

聞

庚申

議酌派駝隻事宜

辦理屯田副都統定長等奏言解往軍營駝隻須俟將軍行知應用數目將已過關展者即解赴軍營其餘截留補給臺站如全數俱過則托克三哈喇沙爾庫車現有未運之糧即可酌量派運接濟奏入得

旨軍機大臣速議具奏尋議軍需最關緊要駝力亦宜撙節惟在酌量情形通融辦理若駝隻本多

自應將進勦運糧一體應付或一時偶乏又當
視其緩急先後撥補不得存畏難之見致有拘
泥現據吳達善奏解駝隻於備送軍營外仍有
餘駝足供糧運自可無憂缺乏定長等惟宜查
照辦理奏入

上從之

命察核屯田收穫分數定議官員功過

辦理屯田副都統定長等奏言上年闕展等五

處屯田收穫共三萬七千三百餘石今全數碾
出通計上年奏過數目喀喇和卓托克三哈喇
沙爾三處仍與原數相同惟烏魯木齊遊擊金
梁較原數多收三十四石闕展都司瑪呼地畝
本多較他處共多出四百一十石俱交管糧官
員等照數存貯訖奏入

上諭軍機大臣曰屯田糧石關係軍需定長等所報
碾出數目有較上年加增者皆承辦之員實心經

理所致著加恩將都司瑪呼等交部議叙嗣後各處屯田除收穫較多者准其奏請議叙外如較原報之數虧缺無多著暫行登記准以下次盈餘抵補倘再有虧缺即照所缺之數分別議處庶承辦各員知所勸懲可傳諭令其遵照辦理

辛酉

申諭定邊將軍兆惠等速籌進剿事宜

上諭軍機大臣曰前因兆惠等籌議進剿所需兵馬

過多因思數年來如進剿準噶爾哈薩克皆係大
舉即如初次西路進剿僅用兵一萬六千馬五萬
駝七千餘彼時從巴里坤至伊犁沿途皆厄魯特
游牧反覆無定今全部蕩平惟逆回竄伏巢穴較
之準噶爾難易何如兆惠等俱親歷行陣豈不知
此朕意有勁旅五千即可橫行無敵就令不足則
以萬人當之何至尚虞力弱耶伊等身當重任聞
朕令將派出兵數減省萬一不能集事必有後言

然事勢本不需亦何必固執成見且自阿克蘇
至葉爾羌不過如巴里坤至烏魯木齊千餘里之
遙而霍集占摧敗數次尚有何力量此皆伊等所
宜籌及者可傳諭兆惠富德等惟就現在兵力應
機速進至舒赫德將所調駝數行知定長而定長
又諉之吳達善往返商辦多屬具文著將節次議
奏事宜錄寄兆惠等閱看令其籌畫進剿情形具

奏

命獎賞庫車辦事伯克鄂斯璠

上諭軍機大臣曰據舒赫德奏稱公品級伯克鄂對之子鄂斯璠年雖少而辦事敏練等語伯克鄂對駐守和闐甚屬奮勉是以加恩賞給公品級今伊子在庫車辦事亦能盡心効力著加恩賞鄂斯璠三品頂孔雀翎舒赫德即傳旨獎諭

癸亥

命賞給陷賊得脫之索倫等兵丁銀兩

上諭軍機大臣曰成衮扎布奏稱從唐喀祿隊內被
逆賊舍楞等誘陷之索倫兵一百三十八名察哈
爾兵三十五名脫出後發回游牧酌量每名借給
銀六兩令各該處照數扣還等語此等兵丁俱經
力戰今既撤回應酌量賞給整裝銀兩所借之項
著不必扣還以示體恤

甲子

命獎賞購買牛羊之烏蘭察卜郡王阿喇卜坦多爾

濟等

上諭軍機大臣曰據巴爾品奏稱盟長郡王阿喇卜坦多爾濟副盟長貝勒拉旺多爾濟等承辦官買牛羊甚為出力等語著分別賞給緞疋以示鼓勵

乙丑

議調糧運駝隻進兵事宜

定邊將軍兆惠等奏言臣等先擬此次進剿需兵二萬各行屯田大臣挑選綠旗兵二千名以

符額數因計內地解來駝隻不敷馱載將所調
兵丁咨明停止令進兵期近駝隻仍未到來查
從前屯田大臣奏准運糧駝五千隻分派關展
等處臣等愚見與其往來轉運徒致疲乏莫若
每駝運糧一石由各該處送至軍營即留為進
兵之用臣等會商阿克蘇辦事大臣舒赫德據
稱分派阿克蘇駝一千五百隻除倒斃外已將
一千二百隻交富德前往和闐又續到駝一千

一百餘隻除倒斃外存九百餘隻已照原議交卸後發回庫車等語竊思此次進兵必於五月內由阿克蘇起程乘回地麥熟之前抵葉爾羌方妥倘駝隻不足恐悞軍行請將闕展等處現駝三千餘隻俱令運糧前來留備進勦俟內地續解駝隻到日補給糧運奏入得

旨軍機大臣議奏尋議適因舒赫德等將富德帶往和闐駝隻請於兆惠等奏辦駝一萬隻內撥補

臣等議將去年往阿克蘇運送軍需及辦給西
安滿兵厄魯特綠旗兵及陸續運糧駝隻騾頭
輕裝馱載送至阿克蘇以備進剿今兆惠請將
闕展等處駝隻每駝運糧一石留備軍行與臣
等所議相同應再行知各該處大臣等查照原
議及兆惠等所奏辦理奏入

上從之

諭定邊右副將軍富德應援堵截各事宜

欽定四庫全書

平定準噶爾方略正編

卷七十一

上諭軍機大臣曰富德奏稱從前自伊犁過巴勒琿嶺進取喀什噶爾之奏因爾時未至回地今既應援和闐當於事定後探兆惠進兵信息夾攻賊衆仍堵截痕都斯坦等要路等語皆朕屢諭及之者可傳諭富德即悉心奮勉前往所奏請加大神威遠等礮位號侯兆惠處查奏到日一體酌擬加給其得傷侍衛老格喀勒扎布西爾庫勒那木查爾乾清門三等侍衛塔爾海等懇留軍營効力深屬

可嘉併傳諭知之

訓諭副都統愛隆阿

上諭軍機大臣曰據愛隆阿以奉到議叙恩旨給與世職奏謝前來愛隆阿乃駐劄烏什大員現在本地情形及回人生計若何自應詳悉陳奏乃僅以己身蒙恩之處奏謝無一語及於地方著傳諭詢問令其明白回奏

定邊將軍兆惠等疏奏優卹陣亡回人及審訊

降回情節

兆惠等奏言據阿克蘇回人阿卜都什呈稱本城伯克等前遣我兄圖里克默特迎降歸途遇賊中鎬暈絕後五日往尋尚活調養平復又為靖逆將軍等嚮導至葉爾羌陣亡等語經額敏和卓查核屬實伊子尚幼請將阿卜都什用為管事小頭目又烏什降回托克托默特因妄報軍營多得糧食馬駝等事奉

旨拏解審訊臣等訊得托克托默特因母兄妻室在

吐魯番烏什竊馬來投所告大兵掘糧雖未至
一百六十窖之多然尚有其事其餘亦屬有因
又臣等擒獲回人供稱波羅泥都因牧羣被竊
曾將該管之人殺戮似非逆賊所遣間諜應請
同伊母兄妻室等交吐魯番公素賚瑞安插管
束奏入得

旨圖里克默特陣亡可憫著酌量賞卹銀兩緞疋餘

照所請行

丁卯

諭定邊將軍兆惠等偵探賊人信息酌定進兵日期
上諭軍機大臣曰兆惠等此時尚未進兵先宜偵探
葉爾羌等處賊衆情形以定謀略雖現在官兵馬
匹未必能捉生詢問亦當多方措置看來阿克蘇
烏什等城回人必有與霍集占等賊黨熟識者兆
惠即與額敏和卓玉素富等計議於伊等所知回

人擇其可信者遣往葉爾羌喀什噶爾將彼處作何預備情形詢訪明白自屬有益若慮所遣之人或為賊所得轉使知我備細不知逆賊狡詐我即不遣人偵探亦斷無坐待我兵全無知覺之理兆惠等止應將不深悉軍前情事之人遣往并勿洩進兵之期庶為妥協再從前伊等擬於麥熟時進兵適據達爾黨阿等奏稱解往軍營馬匹約五月二十以外可抵阿克蘇等語此項馬匹送到後尚

須飼秣一二旬恐致逾期又難因糧於敵朕意若不能速至竟將馬匹加意牧養尤可得力但不知彼處麥熟究在何時收穫後再種雜糧否亦宜相機辦理不必拘泥此旨

庚午

議進勦糧事宜

參贊大臣舒赫德等奏言大兵進勦糧餉最要今阿克蘇所餘無幾臣等各行定長吳達善等

將闕展所牧羊一萬五千隻牛一千五百隻兒
騾馬五千餘匹儘五月內送到可作二十餘日
行糧候肅州購送羊五萬隻接濟共敷行糧四
十五日令據定長谷覆前項牲隻除倒斃外餘
多瘦癩俟三月間青草發生挑選趨送等語恐
不能如數刻期此時肅州及阿拉善部落所辦
牛羊應已出口又哈喇沙爾存糧千餘石即咨
催該管大臣等調撥駐臺駝隻運送臣等亦以

銀布等物換易回人糧石奏入得

旨軍機大臣議奏尋議兆惠等昨請以闢展等處駝
五千隻每駝運米一石業經准行人定長奏闢
展挑送羊七千隻巴里坤送羊一千五百隻五
月內可到益資接濟且適奉

諭旨如已過麥熟之期即加意牧養馬匹俟回人種
植成熟再行進勦為期更寬將來糧運可以陸
續全到自屬充裕至現在官兵口糧自有各城

所收麥石支用應仍照原議辦理奏入

上從之

授頭等侍衛伯克噶岱默特為拜城伯克

辛未

命陞賞索倫驍騎校庫爾布德等

上諭軍機大臣曰兆惠等奏稱遵旨陞叙侍衛成果

等十人內獎賞孔雀翎索倫驍騎校庫爾布德察

哈爾護軍校索諾木獎賞藍翎索倫領催泰保察

哈爾領催敦多克等本旗並無應陞之缺人獎賞
孔雀翎索倫馬甲綽爾布烏數次効力出衆等語
庫爾布德索諾木俱著授為三等侍衛索諾木仍
在叅領上行走泰保敦多克授為藍翎侍衛綽爾
布烏著授為驍騎校賜號肯特克巴圖魯賞銀一
百兩

叅贊大臣舒赫德等疏奏酌議烏什回城賦稅
舒赫德等奏言臣等昨請定歸順各回城田賦

其烏什城俟貝勒品級霍集斯到日定議續據
報稱霍集占更改舊例於徵收地畝外增羊隻
四十取一之條波羅泥都惟於地畝十分取一
不徵羊隻令供給大兵應視現在物力如何似
難定為成例等語又據伊子呼岱巴爾氏報稱
烏什馬匹除派出外所餘無幾其糧價現在較
前昂貴應請酌定等語臣等加以撫慰令其照
前辦理至霍集斯已前往富德軍營臣舒赫德

領富德所留兵八百名候馬駝軍器齊備亦即
前往其阿克蘇辦事僅永貴納世通二人應否
俟巴祿到來令其協辦請

旨遵行又遊擊伍凌阿曾於庫車力戰得傷現在和
闐同齊凌扎卜等堅守查伍凌阿因遺失礮位
革職可否暫行留任出自

特恩奏入

上諭軍機大臣曰據舒赫德奏請遵旨前往和闐但

富德已與霍集斯同往阿克蘇亦屬緊要者仍留辦事其富德所留之兵著巴祿帶領行走所奏伍凌阿既派往防守和闐著仍留原任

定邊將軍兆惠等疏奏籌辦進剿回部

兆惠等奏言臣等前奏需兵二萬名馬三萬匹駝一萬隻因未知內地辦送實數是以約略具奏及至阿克蘇即檄止所調屯田綠旗兵並撤出西安滿兵馬匹俾進剿官兵得有實濟計逆回

所恃只有二城且賊騎不過五千臣等就現在
馬駝口糧派兵前進務期蕩平回部上慰

聖心奏入報

聞

壬申

諭叅贊大臣明瑞等體察霍集斯情形

上諭軍機大臣曰昨據舒赫德奏霍集斯酌議賦稅
等事看來殊不可信即如所稱霍集占例外徵羊

以致傷損部落波羅泥都並不如是辦理等語其
與波羅泥都相契已屬顯然但以現在事勢不獲
霍集占不止而既獲之後伊可與波羅泥都留於
彼處則甚為得計或欲伴波羅泥都擒送霍集占
以自贖亦未可知故明降諭旨令兆惠與伊同辦
此事若果能招降波羅泥都將霍集占擒獻則大
局已定伊等亦易於辦理不過令其入覲陸續前
來再將伊妻子送京最為妥協此事大有關係可

傳諭明瑞惟與兆惠富德額敏和卓等體察情形
加意慎密辦理

命散秩大臣達什策凌之弟延扎卜來京

上諭軍機大臣曰據兆惠等查奏陣亡之厄魯特散
秩大臣達什策凌並無子嗣惟一弟延扎卜年尚
幼穉等語延扎卜著加恩授為藍翎侍衛令其來
京居住

諭叅贊大臣舒赫德豫籌伊犁屯田事宜

上諭軍機大臣曰現在內地解送馬駝將抵軍營兆惠等帶領前進攻城獲醜軍務不久告竣兆惠富德明瑞年來多著勞績應行回京舒赫德前經獲罪朕加恩復用自當暫留効力將來回部即仍其舊制而伊犁則必須官兵駐守其兵糧即於回人所出租賦內支給不勞內地轉餉方為妥協其回人租賦足養兵若干亦當查詢預備至各城回人向於準噶爾時派往伊犁耕種將來仍行辦理但

厄魯特等調遣回人未必如內地屯戍兵丁辦給行裝糧餉繁費如許可傳諭舒赫德留心詢問得實酌議具奏

定邊右副將軍富德等疏奏應援和闐收復哈喇哈什等城

富德等奏言臣等領兵於三月二十五日至葉爾羌河之克木阿克齊據副都統瑚爾起等報稱初四日至蘇爾統岩里克遇侍衛齊凌扎卜

自哈喇哈什來告初三日夜賊將哈喇哈什攻
取等語我等即急往策應初六日至和闐額里
齊時賊望風即逃尾追二十里俘獲三人詢知
三日前賊人將行裝送回葉爾羌留騎賊在此
今俱逃走續有守城之伯克鄂對待衛噶布舒
納爾布等相會我等即同齊凌扎卜等於初九
日黎明至哈喇哈什忽大霧瀰漫人不相見捉
生詢問知有騎賊六百人步賊百餘人在博羅

齊駐營因乘霧繞出賊後午刻行抵賊營賊始知覺接戰官兵奮擊賊衆奔潰追過阜窪勒河計勦賊百餘人收取馬駝牲隻軍器次日分途搜勦獲賊十餘人供係從葉爾羌隨阿卜都克勒木前來昨大兵猝至射死頭目阿卜都哈里克霍集雅斯其鄂斯璪中箭達厥逃回等語初十日回至哈喇哈什齊凌扎卜等將賊營所掠及逃散回人千餘俱行安插十一日至額里齊

將附近之玉隴哈什城內回人俱行收復令於
各邨莊居住又遣前鋒五十八索倫兵鄂提雅
往齊爾拉城同伯克密喇等收獲逃散回人四
千餘戶其克勒底雅塔克二城亦馳書前往招
撫令其頭目來見等語臣等初遣瑚爾起時未
敢望成功如此之速皆賴我

聖主威福

上天垂佑之所致也又據噶布舒等呈稱額里齊城先

係索倫署驍騎校烏爾圖保等固守是時克勒
底雅齊爾拉伯克阿里木沙錫魯卜及玉隴哈
什之伯克等俱突圍入城遊擊伍凌阿領綠旗
步兵五百名至哈喇哈什亦入城協助并通信
塔克之伯克等不可從賊其克勒底雅齊爾拉
所餘回衆降賊將阿里木沙等妻子執徇城下
人心動搖陷在朝夕幸得救援賊始奔潰等語
又齊凌扎卜呈稱賊黨前至哈喇哈什攻圍數

日又分遣賊衆攻額里齊噶布野等前往守禦
我與守備富能領兵守哈喇哈什因城內乏水
於城外掘二井派兵防守三月初三日賊將井
填塞人心益搖爭先逃走因突圍而出適與瑚
爾起相遇等語并據齊凌扎卜噶布舒等查出
効力及陣亡得傷官兵三十九員名瑚爾起遣
送文書之回人鄂碩爾多爾瓦曾隨伯克鄂對
等安撫回衆嚮導回人喇木圖拉俱伯克霍集

斯所屬又瑚爾起隊內伯克鄂對之姪阿卜都爾滿噶布舒隊內嚮導回人默們俱奮勉効力霍集斯所屬回人阿什默特領兵力戰造箭給軍查獲賊藏糧石妻室子弟俱為賊害應請旨交部議叙議卹及酌量獎賞奏入

上諭軍機大臣曰富德奏據瑚爾起等領兵前至和闐賊衆聞風潰散恢復各城深為嘉悅前所加惠富德等爵賞不必奏辭瑚爾起巴圖濟爾噶爾

俱交部議叙給與世職齊凌扎卜噶布舒著授為
散秩大臣交部議叙給與世職藍翎侍衛納爾布
陞授三等侍衛散秩大臣伯克鄂對係公品級著
加恩封為公遊擊伍凌阿係革職留任之員著准
其開復索倫驍騎校扎卜敦察勦賊二名將得傷
之馬甲錫圖庫爾救出甚屬奮勉著授為防禦賜
號達爾漢巴圖魯賞銀一百兩其餘効力之呼倫
貝爾佐領署營總塔濟爾圖著陞授叅領健銳營

署前鋒章京富勒琿授為副前鋒章京索倫三等侍衛多爾濟勒圖達薩木保俱陞授二等侍衛獎賞孔雀翎索倫驍騎校巴岱驍騎校愛新保俱授為防禦健銳營副護軍校永格藍翎前鋒長傳僧額前鋒興住訥衣圖厄魯特護軍布顏圖俱陞補護軍校獎賞藍翎索倫領催博尼塔克薩勒圖庫巴喀畢薩勒圖俱陞補驍騎校吉林馬甲法林保索倫馬甲巴爾都等俱陞補為領催綠旗都司常

清陞補遊擊馬兵韓文拔補把總厄魯特碩爾海
授為藍領侍衛貝克授為護軍其陣亡官兵俱交
部照例議卹又

諭曰瑚爾起噶布舒等所報之前鋒五十八回人阿
卜都爾滿默們著有勞績著加恩俱授為三等侍
衛阿什默特著授為三品總管賞戴孔雀翎有小
城伯克缺出即行酌量補授其回人鄂碩爾多爾
瓦等除獎賞翎頂外仍酌賞緞疋銀兩

臣等謹案和闐六城為回部扼要地當我師
深入傳檄受降不費一矢蓋諸城久苦逆酋
之迫脅翕然思欲歸附

天朝以安居樂業真不啻望若雲霓矣迨大軍黑水
被遮賊黨因得乘間妄肆侵軼其時勢難兼
顧而額里齊乘陴堅守者經三月餘將軍等
既解圍克捷即掄勁旅疾行戈壁中奮勇進
援蟻賊懾我先聲各鳥獸散我兵遂收復額

里齊而哈喇哈什亦即選定玉隴哈什齊爾
拉並以次安輯且博羅齊之役因大霧瀰漫
得以潛襲賊營殲渠魁而成克捷

天佑所彰尤稱神異而克勒底雅塔克二城亦皆生縛
賊酋跽迎道左軍威所播逆賊霍集占等遊
魂驚悸惟謀捆載遁逃不敢復作嬰城之想
夫六城甫定旋為賊衆所窺援兵未集之前
即身在行間者亦未敢逆料成功之迅速如

此乃衆志鞏固不搖遠人嚮慕固貳諸城或
危而復安失而復得

天心助順適叶

聖謨揚

景鑠而肇鴻庸即此足徵耆定之先機矣

諭定邊將軍兆惠等撫賞堵剿各事宜

上諭軍機大臣曰富德等奏叙官兵功次乃據瑚爾
起呈報者著傳諭富德於兵抵和闐時將從前守

城効力回人詳加查詢其各城伯克等果有隨同
齊凌扎卜等始終一節之人即酌量補授總管令
其辦事其餘回人應獎賞者惟問之齊凌扎卜噶
布舒鄂對等諒必深悉至從前奏報黃夜踰城出
降之回首及醉我城守官兵迎降鄂斯瑞者著富
德亦查出正法示衆其脅從餘黨酌量寬免仍行
安插前兆惠富德合兵後朕亟於應援和闐因其
地當要隘且糧食豐足料霍集占等必以死爭今

既未增兵且望風奔潰則其心寒力竭可知併傳
諭兆惠等於逆賊逃竄之路嚴行堵截若賊仍據
城堅守則攻擊仍需礮位計內地所送鑄礮匠役
已抵阿克蘇此時應已成造又有健銳營前鋒等
登城乃其長技其速行進勦以奏膚功

賜拉達克汗

勅書

皇帝敕諭拉達克汗爾遠處邊方感戴恩澤凡所得

回人信息俱報明駐藏之章嘉胡土克圖及大臣
等轉奏朕鑒爾悃忱深為嘉悅至大兵進勦逆酋
克城甚多俱駐兵防守今進取葉爾羌喀什噶爾
等處波羅泥都霍集占兄弟力窮勢蹙斷不能支
惟有棄城遠遁朕亦不以出兵協勦之事委之於
爾倘逆賊等投入爾境內當擒獲看守送至藏地
朕必厚加恩賚若不即縛送日後朕必知之於爾
無益今以頒降勅書賜爾上用緞十端爾其祇領

特諭又

諭軍機大臣曰章嘉胡土克圖等奏稱拉達克汗遵
旨遣伊屬人扎什丕勒託故至葉爾羌將所有見
聞詳悉具報等語覽所報情形與軍營事體不甚
差謬故降勅獎諭其所遣之扎什丕勒雖駐藏大
臣業經賞給銀牌緞疋茶葉仍酌量加賞以示優

獎


甲戌

申諭定邊右副將軍富德等續查和闐戰守勞績

上諭軍機大臣曰昨富德等奏叙固守和闐各城及
應援勦賊功穴朕命將節次奏報詳查前經永貴
等奏據齊凌扎卜等報稱曾遣滿洲哲勒順防守
克勒底雅城有回人默默里提卜哈子鄂斯瑞等
與鄂斯瑞相應致哲勒順被害等語富德抵和闐
時宜將殉難之人詳查情節擒獲兇黨即行正法
至所奏戴獎賞領烏爾圖保喀爾喀章京達什回

人多羅特默特等曾守額里齊自必著有勞績且
回人鄂碩爾多爾瓦告稱伊隨鄂對等前往和闐
聲言援兵將至阿卜都克勒木等敗走出城等語
賊若已入城則烏爾圖保等豈能免害此三人現
在何處及鄂碩爾多爾瓦所言虛實著再行查明
具奏又賊人在哈喇哈什奪井時回人密喇卜阿
卜都哈里克瑚岱訥則爾等俱得傷瑚爾起等勦
賊時馬甲永保巴雅爾曾勦殺賊人俱應加恩議

叙何以未入奏內至瑚爾起等所領兵丁亦屬効
力著查明曾否酌賞銀兩因便奏聞



欽定四庫全書

卷七十一

平定準噶爾方略正編卷七十一

欽定四庫全書

史部

平定準噶爾方略正編卷七十五至

詳校官監察御史臣孫家賢

通政使司副使臣莫瞻菴覆勘

總校官進士臣朱鈐

校對官編修臣朱紱

謄錄監生臣劉佳瑋

欽定四庫全書

平定準噶爾方略正編卷七十二

乾隆二十四年夏四月乙亥

訓諭八旗大臣官員

上諭軍機大臣曰朕今日恭閱

皇祖實錄議政大臣等奉

上諭

大祖

太宗時滿洲兵凡遇征戰馬匹口糧自備行走所向立功並無遲悞今官兵行走處馬匹口糧器械等俱給帑置辦且以為不足而怨咨生焉此皆由該管官不行嚴飭之故也朕辦理軍務閱歷甚多向時征討岳州雲南皆決於進取乃得成功後征噶爾丹中路進兵大臣官員會議以為不可惟朕與費揚古決意進兵噶爾丹聞風驚懼鼠竄而去朕將中路初次運到之米遣明珠速送費揚古軍前二次米亦令續送三

次米內朕但留十八日口糧餘皆送往西路是以兵
丁未至饑餒彼時若輕信大臣等之議中道撤兵則
兩路兵丁安得立功奏凱耶今觀領兵大臣官員等
祇為保身之計不以國事為重內存私意彼此爭論
不和又向兵丁等沽名市恩多取口糧及不能馱載
至於拋棄全無珍惜之意如此居心行事可乎朕之
滿洲兵俱極精鍊全在領兵者將國家之事專心辦
理不圖安逸賞罰嚴明則斷無錯悞進兵西藏時塞

楞不候衆人獨自前往額倫特亦隨後追至為國家
奮不顧身雖致失機豈可論伊等進兵太速乎今策
旺諾爾布係差往策應之兵而遲延不前雖伊所統
兵丁善全而歸伊屬下之兵固然感念與國事有何
裨益朕年少時每於講武練兵等事違命者必懲以
法內外大小悉知儆惕由此觀之訓練之事不可疎
忽也茲衆喀爾喀及青海人等俱服朕德化而策妄
阿喇卜坦之人霸占藏地毀其寺廟散其番僧朕思

伊兵步行一年有餘忍饑受餒尚能到藏我兵顧不能至乎今滿漢大臣咸謂不必進兵朕思此時不進兵安藏賊寇無所忌憚或煽惑沿邊諸番部將作何處置耶故特諭爾等安藏大兵決宜前進欽此蓋彼時臣工內即有囿於己私惟圖安逸之習氣故

皇祖神謨獨斷毅然辦理是以每遇用兵罔不克捷朕御極以來曾屢降諭旨力除此習卽如數年來辦理軍務大臣中不願者居多亦因朕指示催督始

能勦殺賊衆所向無前閱時未久即平定準噶爾
且回部葉爾羌喀什噶爾諸城早晚亦可奏績惟
從前永常策楞等以馬匹口糧為詞一意退縮以
致大功不成各罹罪譴雅爾哈善以大兵全力圍
賊一城並不急攻且坐視逃竄國憲難宥故即行
正法此皆徇私心而忘國事之炯戒也至行兵口
糧固屬緊要亦當計其便於裹帶若但拘成例支
給過多以沽名譽及至不能轉運徒然拋棄於兵

丁有何裨益軍行糧隨乃前代漢人陋習曾經諭
及凡將軍大臣等領兵應支口糧惟量足裹帶途
中再為通融擗節何至不能接濟況官兵應支口
糧歸途有補給之例若論事屬已往雖不給亦可
而仍如此定例者乃朕軫念兵丁之至意俾行走
時既覺便利又得補給之項以贍身家耳數年來
將軍大臣內兆惠富德在軍前行走尚好亦因遵
朕訓諭率先勇往鼓勵官兵雖間有不合機宜然

究未貽誤公事至從來滿洲官兵皆係勁旅遇有
戰戰惟知前進毫無退縮該管大臣官員等平時
並不勤加訓練臨事又不能率先鼓勵可惜朕之
精兵皆為此等大臣官員所悞若果盡心於教訓
倡率則何功不成昨據富德等具奏此次進剿之
健銳營滿洲兵於攻戰之時放鎗迅利奮勇直前
等語健銳營係朕新設勅大臣等勤為操演又時
親簡閱始能技藝嫻熟破賊立功八旗大臣官員

皆有練兵之責果能盡心教訓則兵丁技藝自皆一律健銳又何須另立營名乎欽惟

皇祖以講武練兵不可疎忽

聖訓昭垂實萬萬年永當遵守者著傳諭八旗大臣官員等嗣後各除便己求安之私意惟知訓練兵丁務使技藝嫻熟不失滿洲舊習庶兵丁皆成勁旅而風俗日以還淳於國家之事大有裨益矣此旨著通諭八旗仍於各旗演習騎射處所刊刻永遠

奉行毋怠

丙子

諭定邊將軍兆惠等酌計糧餉進兵

上諭軍機大臣曰定長等奏稱准兆惠等咨內地所
送駝隻至哈密開展時酌量每駝運糧一石抵阿
克蘇隨以此項駝隻俱行走數千里不能多運惟
擇其臙壯者輕裝馱載等語昨以達爾黨阿等奏
報所送馬匹五月間可至阿克蘇朕即謂已過麥

熟之期或候回地續種田糧再行進勦此特恐馬力既未齊全糧餉又不能接濟不得已而稍待之意今思阿克蘇等處亦未必有二萬餘馬牧場且天暑易致疲乏而定長復不能多運糧餉若再停留不進而官兵又虛糜兩月之餉矣莫若仍於五月進兵雖麥熟過期必有尚未收割者可資接濟庶功以速成不必拘泥前旨著傳諭兆惠富德舒赫德等會議具奏定長等亦令其酌量辦理

定邊將軍兆惠等疏奏查詢侍衛拜達爾勞績
兆惠等奏言臣等欽奉

諭旨查得三等侍衛拜達爾原在雅爾哈善軍營去
秋隨臣等至葉爾羌以英額奇盤山之戰同瑞
綽爾圖等為前鋒遇賊陣亡業經具奏去年六
月間雅哈托和鼎之戰拜達爾領巴圖魯兵二
十名衝陣侍衛噶布舒等欲候大隊同進拜達
爾激罵同行不許退後亦經保列頭等功次奏

入得

旨拜達爾已加恩優卹給與世職矣

辦理屯田副都統定長等疏奏遣發存留滿洲
索倫等官兵

定長奏言臣等准兆惠咨將各處存留之滿洲
索倫蒙古兵丁速令起程於四月內抵阿克蘇
茲于三月三十等日吳達善送馬一千匹前來
臣等除酌留臺站兵丁外計送往軍營各官兵

三百八十五人辦給行糧馬匹陸續起程奏入
報

聞

丁丑

定邊將軍兆惠等疏奏酌籌進勦事宜

兆惠等奏言臣等從前擬將和闐阿克蘇分為
兩路特因和闐被圍且有通喀喇土伯特痕都
斯坦之路俟應援事竣進攻葉爾羌而阿克蘇

之兵兩面夾攻兼堵截賊人逃往拔達克山等
要隘若兵多則分攻喀什噶爾互相牽制今兵
數不多恐逆賊拒守葉爾羌必須兩路合兵攻
圍俟克城後再分兵略地及堵截來援賊衆今
接奉分兵

諭旨謹錄送富德令其定議具奏外臣舒赫德即將
阿克蘇所有馬駝內選其堪用者前往和闐安
撫回衆其酌調布魯特屬人及查拏哈薩克錫

喇臣等於三月初八日即遣侍衛成果布延泰等傳檄布魯特候回報定奪奏入

上諭軍機大臣曰富德至特穆爾圖淖爾攻喀什噶爾舒赫德前往和闐皆從前酌定者今富德已定和闐自當由彼進發兆惠雖令富德定議恐往返需時可傳諭富德令其徑從和闐進兵攻取葉爾羌一面堵截逆賊等逃竄之路昨據舒赫德請前赴和闐令巴祿在阿克蘇辦事已降旨停止即此

時業已起程亦仍回阿克蘇此旨著速行馳遞

戊寅

諭定邊將軍兆惠等酌籌送馬事宜

上諭軍機大臣曰據富德奏稱前往和闐一路地多
戈壁詢之守備傅能亦以前途牧場既稀而水泉
亦少現將所領兵馬分為五起牽馬步行等語是
解送馬匹甚關緊要達爾黨阿哈達哈所送之馬
二萬餘匹係分給兆惠富德兩軍者抵阿克蘇時

將送交富德之馬作何分起解送不致疲乏可傳諭兆惠富德詳加酌議具奏一面即行辦理

命以陞賞侍衛齊凌扎卜等情等宣示官兵

上諭軍機大臣曰富德奏稱途遇守備傅能等領綠旗兵五十餘名從哈喇哈什脫出告知伊與齊凌扎卜等固守情節仍願隨同進兵因其困憊令往兆惠軍營休息以備詢問等語齊凌扎卜傅能有守城之責城既失陷自當治罪但哈喇哈什係回

城初降衆心未定非內地城守可比且兵餉不足尚能勉支三月餘迨勢孤援絕內外變亂始行脫出旋又隨大兵恢復苟非齊凌扎卜堅守之功則援兵雖至亦已無及是以加恩優敘今傅能係隨同齊凌扎卜守城不必一體陞賞但亦屬勞苦著加恩遇有都司遊擊缺出即行補用隨同脫出之兵丁殊堪軫念著兆惠等查明酌賞銀兩恐軍營官兵等以齊凌扎卜傅能既已失城功不抵罪何

故加恩妄生揣度亦未可定可通行曉示知之
命酌定有功人員賞給巴圖魯號

上諭軍機大臣曰富德將交查之藍翎侍衛那木查爾等十人功次查奏又稱此次保舉人員內索倫藍翎伊登古獎賞藍翎科丕塔俱應賞巴圖魯號等語昨諭查奏軍營應賞巴圖魯號人員原欲拔其殊尤加以寵錫今所奏尚未明晰豈伊等多人均應賜號耶著傳諭富德將此中實屬奮勉超羣

立功異衆者查出四五人具奏又兆惠奉諭惟查
奏綽爾布盈一人朕已加恩賜號看來伊隊內効
力人多所舉尚覺其少亦傳諭兆惠再照前例查
出一二人奏聞請旨

命革副將高宗瑾職押赴烏魯木齊効力

上諭軍機大臣曰吳達善參奏副將高宗瑾委令總
理解送軍營羊隻托病推卸規避不職請革職發
往烏魯木齊屯田効力所奏甚是高宗瑾身為大

員遇事推諉若僅予革職實不足蔽辜但甘省距烏魯木齊頗遠此等無恥懶惰之人若令其自行領咨前往中途不免捏病逗遛著傳諭吳達善委員押赴烏魯木齊交與屯田大臣收管令其當差効力以為官員規避者戒

五月庚辰朔

命欽天監監正明安圖等往繪回部地圖

上諭軍機大臣曰回部將次竣事應照平定伊犁之

例繪畫輿圖明安圖傅作霖著賞銀二百兩西洋
人高慎思籲請同行亦賞銀二百兩二等待衛什
長烏林泰乾清門行走藍翎侍衛德保賞銀各一
百兩德保仍授為三等待衛整裝馳驛前往

辛巳

恩免陝西承辦軍需各屬地丁錢糧

上諭大學士曰前因陝西與甘肅毗連之各廳州縣
年來亦有承辦軍需差務小民踴躍急公深堪軫

念特降旨該督令其查明奏聞今據吳達善將辦
差各屬分晰查奏前來所有出力最多之潼關華
陰華州渭南臨潼咸寧長安咸陽醴泉興平乾州
永壽邠州長武府谷神木葭州懷遠榆林定邊靖
邊等二十一廳州縣本年額徵地丁錢糧著加恩
普免十分之三其同官高陵涇陽三原富平盩厔
鄠縣藍田耀州大荔蒲城澄城韓城白水郃陽朝
邑鳳翔岐山寶雞扶風隴州汧陽麟遊郿縣三水

淳化武功等二十七州縣本年額徵地丁銀糧加
恩普免十分之二南鄭褒城寧羌沔縣城固洋縣
西鄉略陽鳳縣商州商南雒南鎮安山陽鄜州洛
川中部等十七州縣本年額徵地丁銀糧加恩普
免十分之一以示一體優卹加惠黎元至意該部
遵諭速行

諭參贊大臣巴祿隨富德由和闐進兵

上諭軍機大臣曰巴祿奉到阿克蘇辦事之旨奏請

願赴軍營同將軍等進勦等語昨已諭巴祿領富德存留之兵前往和闐辦事今伊既願同將軍進勦著即同富德由和闐領兵前進但和闐仍須大員駐劄著福祿即留辦事務亦諭兆惠等知之

總督管甘肅巡撫吳達善疏奏臺站兵糧就近擬運事宜

吳達善奏言查口外軍營安設臺站從巴里坤北至烏魯木齊南至阿克蘇俱需駝隻轉運合

計一月用駝二百餘倒斃者十之七八購辦不
易臣查巴里坤一路臺站自今春改設山南以
來兩路俱會哈密迤西而哈密闢展兩處均有
運貯糧石其由闢展至托克三哈喇沙爾庫車
阿克蘇等處俱安設糧臺兼有收穫屯糧請自
五月以後不必由巴里坤辦運徑從哈密闢展
等處撥運其闢展至阿克蘇各就近分臺撥運
更按各地情形在百里以內者即令各臺兵按

月自赴糧臺或屯所隨便支取其自托克三及
烏魯木齊以東地尚平坦酌催商車分送自哈
喇沙爾至阿克蘇合計所需糧數每月不過數
十石應請即於各糧臺現有駝隻內每月量撥
二三十隻即可運送一次沿途分給需駝無多
自可通融辦理奏入報

聞

壬午

參贊大臣舒赫德等疏奏購買回人穀石情形
舒赫德奏言查各城回人等感戴

皇仁臣等定議糧馬價值均因其所願並無迫脅本
年二月以來青黃不接臣等同伯克等照每石
二兩五錢之官價加至兩倍至回人等最需內
地布疋每疋以二兩至二兩五錢折兌布三疋
即可得穀一石其烏什阿克蘇等處穀價每石
自三兩至五兩不等今市價較昂臣等公議每

石酌量增加回衆無不踴躍出糶並行文烏什
庫車等處一體辦理臣現在購買回人馬一百
匹又選駝九十隻派官兵百名運送鎗礮軍器
於四月十一日自阿克蘇起程前往和闐至和
闐甫經安集應及時耕作臣與永貴等會商攜
帶銀兩緞布以備獎賞奏入

上諭軍機大臣曰前諭舒赫德同霍集斯前往和闐
特為堵截逆賊霍集占等逃逸今富德已從和闐

進兵阿克蘇亦屬要地仍令駐劄辦事曾屢降諭
旨今業經前往接得此旨即將官兵等及運往軍
需交與富德辦理仍輕騎轉回阿克蘇亦傳諭兆
惠等知之

癸未

諭定邊將軍兆惠等體察伯克霍集斯情形

上諭軍機大臣曰兆惠等奏稱從前詢問霍集斯據
告云烏什有通喀什噶爾之路雖覺稍近而地險

多石水泉不足往葉爾羌渡河亦難今伊已抵富德軍營應行文令其就近詢問等語烏什一路行走既難富德仍即自和闐進兵防禦喀喇土伯特等要隘朕詳察霍集斯情形似以擒獲霍集占等後回酋無出其右者意在總統回部曾密諭兆惠等留心防範但霍集斯雖不可信而從前曾擒獻達瓦齊此次納降又隨將軍等在葉爾羌効力若驟行究治回人未免驚疑著再密諭兆惠等霍集

斯此時如情形巨測斷不可留則亦不得姑息從
事或不過恃功率意即暫示包容俟事竣後與伊
同行來京照達瓦齊之例安置亦屬妥協兆惠等
宜加意慎密以合機宜

甲申

諭定邊將軍兆惠等通融支給火器

上諭軍機大臣曰五吉奏稱提督門相師咨取火藥
鉛丸等件查從前因內地解送闢展駝隻已經搭

運而楊寧等所領綠旗兵所攜亦多今駝隻已全
過哈密續解尚需時日等語軍營進勦兵丁均屬
効力所有需用器械宜量其有無緩急通融支給
不可彼此歧視閭相師隊內火藥鉛丸即有不足
自當於楊寧隊內取用必欲接營分領殊屬拘泥
嗣後內地所送軍需兆惠等須酌量派撥勿分彼
此但軍前火器最要不妨寬裕貯備五吉等既稱
陸續送至闢展定長等亦當於糧運之便轉解阿

克蘇俱著傳諭知之

乙酉

定邊右副將軍富德等疏奏收復塔克克勒底
雅二城

富德等奏言臣等近將瑚爾起等復取哈喇哈
什招撫塔克克勒底雅等城具奏四月初四日
據瑚爾起等報稱三月二十一日遣往克勒底
雅之索倫領催庫卜堪厄魯特錫爾魯克回人

默密特等領克里雅城頭目十餘人前來告稱我等將近克勒底雅時有四德和卓等將賊人阿卜都克勒木等所用頭目布庫塔斯擒執出城來迎隨飭令嚴加看守即抵其城沿途村堡回人俱甚欣喜又據遣往塔克之索倫隨營委官徹克德赫爾厄魯特得木齊巴蘇泰等告稱行至塔克詢問回人知伊等頭目默里善等避賊入山結寨自守因尋至其地默里善出迎將

賊所用頭目諾們伯克等及所遣之摩羅岳科
卜等俱各擒獻今將默里善領來又據四德和
卓等告稱從前侍衛噶布舒伯克鄂對等遣人
前來我阿里木沙領兵助守額里齊人餘人因
無管領是以為賊所迫默里善告稱我等結壘
深山賊人據城曾屢次迫脅並未往見再霍集
占牧羊大小約四百隻阿卜都克勒木給回字
文書六件一併獻出謹先呈報其擒獲之布庫

塔斯諾們伯克等俟解至軍營審訊另報等語
臣等伏覩和闐等城危而復安失而復得不勞
攻取悉合機宜皆賴

上天默佑

聖主威福如此顯著逆酋計日可擒臣等前留侍衛
章京永德在阿克蘇等候馬匹軍器現在咨明
兆惠將所到軍需先行辦給不必同巴爾楚克
之兵一路起程以致紆道貽悞奏入

上諭軍機大臣曰克勒底雅塔克回人等聞官兵將
至擒獲賊人所用頭目爭先迎降甚屬可嘉著富
德至和闐日將伊等功次查奏候朕加恩至從前
克勒底雅回人墨墨里提卜哈子鄂斯瑞為賊內
應以至城陷此二賊當查拏正法若已隨阿卜都
克勒木逃去則進剿時亦當留心查辦不可致令
漏網又

諭曰富德等現從和闐進兵若阿克蘇辦給馬匹從

巴爾楚克路與兆惠同行必致遲悞業已咨行兆惠自必先為辦給至解送馬匹務使不致疲乏以歸實用朕亦已降旨但內地馬匹送至阿克蘇分給兩路而富德一路則仍須遠送和闐且伊又不及親身查驗以公義權之縱不擇其臙壯者解送亦當均勻分撥然官兵等惟圖便己亦情勢所必有兆惠統轄全軍自當秉公查辦作何先令起程加意照看著一面辦理一面具奏併傳諭富德知

之又瑪瑞來京據奏云巴爾楚克頗有水草牧馬
二萬匹可供一月等語兆惠與富德相約會兵若
自阿克蘇直抵葉爾羌恐長途馬匹疲乏或在巴
爾楚克稍為駐牧候富德信息亦甚有益但恐賊
人知覺豫備然我自阿克蘇進兵賊亦未有不知
者其悉心計議辦理再瑪瑞奏云從前濟爾噶朗
潰圍時有索倫英格圖遇賊負傷力戰甚勇現在
兆惠軍營等語英格圖行走若何有無勞績亦著

查明遇便奏聞

丙戌

諭定邊將軍兆惠等辦送兩路馬匹官兵分隊前往

軍營

上諭軍機大臣曰昨諭兆惠等將辦送富德馬匹秉公挑選先行起程但此次所辦馬匹若交與永德等送往則人數無多不敷照管且永德已諭令隨努三回烏魯木齊辦理哈薩克貿易事務此時業

經前來亦未可定內地辦解馬匹係達爾黨阿哈
達哈等護送應將伊等分為兩隊往和闐者著達
爾黨阿傅景等帶領即在富德軍營行走增添兵
丁更於進勦有益兆惠如亦須增兵則先派西安
滿洲兵五百名達什達瓦厄魯特兵丁二百名前
往和闐其餘官兵著哈什哈伊柱官長保等帶領
在兆惠軍營行走俱著傳諭知之

庚寅

恩賞糧運兵丁衣履免扣錢糧

上諭大學士曰據定長等奏稱現在關展存貯衣履等件請分給由哈密運糧送駝之西安等處滿洲綠旗兵丁其不足者支取布疋製給所用銀兩在各兵錢糧內照數扣還等語此次兵丁輓運軍需往返行走甚屬勞苦著加恩將所給衣履等件動用銀兩不必扣伊等錢糧即行賞給以示優恤

壬辰

諭定邊將軍兆惠等加意搏節糧餉

上諭軍機大臣曰永貴等奏稱內地購辦牛羊通計
十二萬隻有奇可供二萬兵丁三月口食又舒赫
德等向回人換易及內地運送糧餉除支給官兵
外所餘尚可給進兵後半月之餉等語所辦頗屬
妥協現在麥秋將屆回人既有應交糧石加以布
疋換易軍食自可裕如且進勦之兵既有半月裹
帶抵葉爾羌時賊人亦已收獲可以搜取加之羊

隻接濟自無匱乏之虞兆惠等宜加意撙節為要
其運送各色布五千疋已傳諭吳達善令其酌量
採買或一時難得即奏請由京辦理解送

癸巳

恩卹軍營病故綠旗兵丁

上諭大學士曰兆惠等遵旨將進攻葉爾羌及歸途
病故之綠旗兵丁查明具奏從前明瑞到京朕詢
以軍前情形據奏綠旗兵丁內有患病身故者朕

心深為軫念今據秦病故兵丁皆係雅爾哈善自
庫車帶往因採食杏實等物過多腹泄病故等語
似此情節皆雅爾哈善毫無紀律所致伊等雖非
身冒矢石効命行陣者可比究係奉調出征在途
身故亦屬可憫著將軍兆惠等查明伊等標營姓
名造冊咨送楊應琚吳達善等查出伊等子弟即
或年幼亦著充補名糧徐為教育仍酌量賞給銀
兩以昭朕加恩優卹之意

定邊將軍兆惠等疏奏豫籌進剿情形

兆惠等奏言臣等查回人所種之麥因今年有
閏月六月始能收割須於賊未收穫之時大兵
前進方有裨益現在內地辦送馬匹計五月望
日前後可以到來除應送富德軍營者先行辦
理起程外臣等定於五月內務行進發至派出
回人等偵探聲息捉生詢問等事曾與額敏和
卓相商有烏什所屬之布魯特四十戶可以酌

量差遣已將伊等挑選十人豫備臣等惟有勉力前進相機辦理以期迅奏成功奏入報

聞

乙未

諭喀爾喀副將軍策布登扎布查奏沿途堵剿情形
上諭軍機大臣曰近據策布登扎布奏稱四月十五日領兵起程前往塔爾巴噶台等處防堵逸賊等語著傳諭策布登扎布伊起程已經一月此時現

至何處何時可抵塔爾巴噶台沿途曾遇一二嗎
哈沁否再塔爾巴噶台至特穆爾圖淖爾相去有
幾日之程自彼回至烏里雅蘇台中間路徑孰近
孰遠其詳悉查詢具奏

丙申

諭定邊左副將軍成衮扎布等籌辦折給官兵糧餉
上諭軍機大臣曰前據成衮扎布等奏稱策布登扎
布領兵前往塔爾巴噶台每兵支給六月錢糧其

應得六月餉米酌量折給銀兩羊隻等語此次折給銀兩羊隻或仍辦給官羊或總令伊等自辦若不敷食用作何運送接濟亦曾籌備否可傳諭成衮扎布令其即行具奏

諭熱河副都統富黨阿等安插達什達瓦屬人事宜上諭軍機大臣曰富黨阿等奏稱達什達瓦屬人等已到熱河一切辦理尚需時日先按人口每月給米二斗銀三錢暫行接濟俟查明戶口若干以定

官兵額數給與錢糧養贍另行具奏等語富黨阿
此奏稍覺稽遲已差三和前往辦理賞給所奏支
領米石即准其散給至賞給銀兩三和現在辦理
或已經分賞亦不必追繳其將伊等作為官兵酌
給俸餉之處著詳議具奏伊等未經出痘應授官
職人等不必送京候朕駐蹕熱河時再行帶領引
見

己亥

諭定邊將軍兆惠等覆奏和闐脫出回人所告情形
上諭軍機大臣曰兆惠等奏稱詢問伯克鄂對遣來
阿克蘇之回人瑪瑪特訥則爾據告稱賊黨阿卜
都克勒木見大兵將到遣人請霍集占增添賊衆
霍集占派騎賊一千五百人以喇木呼里帶領自
葉爾羌行走二站駐於羅克賊黨鄂斯瑞從和闐
敗逃行走五站駐於固瑞等語著傳諭富德此時
應已抵和闐鄂斯瑞等若仍在固瑞相去甚近自

必擒勦或已逃回葉爾羌即行奏聞又瑪瑪特訥則爾告稱在和闐時曾聞痕都斯坦路管賊卡倫之賽特巴沙爾聞大兵至即降因往取妻子為賊人所殺伊一孫不知其名自固璫脫出報知增添賊衆信息等語著富德查明奏請酌量加恩賽里木伯克呢雅斯守哈喇哈什時得傷身故亦屬可憫伊有無子孫亦併查奏瑪瑪特訥則爾及同來之鄂對妻兄阿璫伯克沙雅爾回人薩爾巴三等

俱曾効力行走兆惠現在行文富德詢問鄂對俟
咨覆得實即酌賞銀兩又

諭曰據瑪瑪特訥則爾告稱霍集占於葉爾羌附近
耕種等語是逆賊等尚無遠遁之意蓋伊等以我
兵到彼不過攻圍數月未能持久俟撤兵即可無
事著傳諭兆惠等進兵時須加意備辦攻城器具
現在吳達善於肅州造送攬牌又有鑄造大礮及
雲梯等件足以突陣衝堅至賊人逃竄之路亦宜

嚴為堵截再披閱地圖痕都斯坦一路似與克勒底雅相通克勒底雅為和闐六城之一富德等宜詳加詢問派兵防範現在駐劄何處著即奏聞

命賜吉林署協領布爾哈等巴圖魯號

上諭軍機大臣曰前據明瑞奏健銳營前鋒林保不待雲梯直薄賊寨朕已賞給噶克察巴圖魯號仍諭兆惠將似此奮勇擊賊之人查出請旨令據將吉林署協領布爾哈等十四人列單具奏著加恩

將布爾哈賜號布彥圖巴圖魯索倫署參領巴勒
琿賜號噶畢雅圖巴圖魯哲野勤圖賜號齊爾瑪
海巴圖魯烏密勒圖賜號固濟爾巴圖魯委署防
尉固勒克訥衣賜號肯特克巴圖魯吉林署驍騎
校薩爾泰賜號鄂莫克圖巴圖魯馬甲英賚賜號
巴爾巴圖魯索倫領催隆恰賜號超圖巴圖魯烏
延察賜號阿勒達爾泰巴圖魯額默勒肯賜號賽
沙勒圖巴圖魯和靶勒圖賜號衛魯克森巴圖魯

穆庫楚賜號額德格勒圖巴圖魯錫扎布賜號噶魯克三巴圖魯察哈爾驍騎校巴圖孟克錫號巴圖巴圖魯照例賞銀各一百兩以示鼓勵

命賞隨將軍納穆扎爾力戰負傷脫出兵丁

上諭軍機大臣曰據兆惠等將納穆扎爾隊內脫出兵丁等查明力戰得傷情節造冊送部等語前據舒赫德於巴爾楚克遇脫出之科科勒岱等四人業經加恩賞銀各十兩此次查送之兵丁等除交

部議敘外俱著照例賞給銀兩以示優恤

壬寅

諭辦理屯田副都統定長等查拏藏匿嗎哈沁各事

宜

上諭軍機大臣曰據定長奏主事富魁於伊犁等處
立碑告竣領兵丁匠役等回至闡展并於博羅通
古拏獲嗎哈沁烏勒木濟據供有綽羅斯台吉烏
勒木濟等三十戶七十餘人在瑪納斯山內藏匿

等語著傳諭定長此等潛踪來往之嗎哈沁必期
盡勦方使地方寧謐達爾黨阿等送馬曾從此經
過否定長等派兵五六十名可否即能辦理至所
請將烏勒木濟賞給肅州官兵為奴但據伊供詞
曾殺傷二人自應抵償已傳諭楊應琚等俟解到
時即行正法

諭直隸總督方觀承酌量分撥馬匹

上諭軍機大臣曰提督吳進義奏上年督臣購備馬

四千匹現在軍務將竣似無急需陝甘營馬抽調
以來應有缺額未補請以二千匹由邊路解赴榆
林二千匹由內地解送西安等語所奏甚是此項
馬匹與其額外分營收槽飼秣孰若酌量分撥陝
甘以補缺額或有需用亦可就近調遣二省原有
馬乾可以支給何必留於直隸致糜草豆現在甘
霖未溥糧價尚昂以此節省之屯豆減價平糶亦
可兼資民食著傳諭方觀承通融籌畫妥協辦理

平定準噶爾方略正編卷七十二